

皇清經解續編

皇清經解彙編

皇清經解續編卷六百二十四

南菁書院

國語發正六

錢唐汪遠孫小米著

齊語

使鮑叔爲宰解宰大宰也

董氏增齡國語正義曰周禮大宰疏引崔靈恩曰諸侯三卿

五大夫司徒以下立二人小宰小司徒司馬以下立一人小

司馬兼宗伯司空之下立二人小司寇小司空齊以高國爲

命卿故曰二守則鮑叔所爲者司徒下之小宰今宏嗣云大

宰未知何所據吳楚僭王宋爲殷後並有大宰未可例齊也

陳奐曰宰猶卿也下文傳臣立三宰韋注三宰三卿也齊大
國三卿高國二守爲二卿管仲爲下卿見於內傳時桓公使
鮑叔爲下卿辭讓管仲也注云大宰失之董慶千以爲司徒
下之小宰亦未是內傳莊九年管夷吾治於高傒使相可也

宰相皆爲卿之通稱

執枹鼓立於軍門解軍門立旂爲軍門若今牙門矣

周禮大司馬職以旌爲左右和之門鄭注云軍門曰和今謂之壘門立兩旌以爲之案旌旂一義也後漢書袁紹傳麴義破公孫瓚于界橋遂到瓚營拔其牙門集韻古者軍行有牙尊者所在後人因以所治爲衙

施伯魯君之謀臣也解施伯魯大夫惠公之孫施父之子

內傳桓九年施父曰曹大子其有憂乎杜注云施父魯大夫通志氏族略魯惠公之子公子尾字施父其子因以爲氏

三疊三浴之解以香塗身曰疊亦或爲薰

薰公序作熏

元和惠氏士奇禮說六曰古熏字多作疊呂氏春秋湯始得

伊尹祓之於廟釁以犧豕風俗通引之作熏以萑葦周禮女
巫釁浴注云釁浴以香薰藥草沐浴康成亦讀釁爲薰

田獵畢弋解弋繳射也

呂氏春秋季春紀田獵畢弋高注云弋繳射飛也高與韋同
月令畢弋作畢翳弋翳一聲之轉鄭注云翳射者所以自隱
也各隨字作訓

搏本肇末解搏等也肇正也謂先等其本以正其末
說文搏等也引春秋傳曰搏本肇末許多用賈說則搏訓等
者國語賈注也孟子告子下篇不揣其本而齊其末揣與搏
古同聲通用

昔者聖王之治天下也參其國而伍其鄙解參三也國郊以內

也伍五也鄙郊以外也謂三分國都以爲三軍五分其鄙以爲五屬聖王謂若湯武也

董氏增齡曰參其國者參分其國以定都之制伍其鄙者伍保其民以爲鄙之制隱元年傳祭仲曰大都不過參國之一杜注三分國城之一疏謂侯伯城方五里長三百雉其大都方一里又二百步長百雉也參其國以爲都則無尾大不掉之憂襄三十年傳子產使廬井有伍杜注九夫爲井使五家相保蓋司徒之法五家爲比使之相保五比爲閭使之相受四閭爲族使之相葬五族爲黨使之相救五黨爲州使之相調五州爲鄉使之相賓自五家之比至萬二千五百家之鄉皆以五起數伍其民以立鄙則無輕去其鄉之慮宏嗣謂三

分其國以爲三軍五分其鄙以爲五屬此管子得齊後新創之制三代之聖王無是也況下文方言定民之居不應舍畫井設廬之事而專言徵徒發兵之事也

國語正義

而慎用其六柄焉解柄本也六柄生殺貧富貴賤也

管子小匡篇殺生貴賤貧富此六秉也秉柄古字通

則其言吮解吮亂貌

說文吮吮異之言小爾雅廣訓襍言曰吮

令夫士羣萃而州處解州聚也

明道本州誤處

大戴禮王言篇明王之治民有法必別地以州之藝文類聚

引春秋說題辭云州之言殊也合同類異其界也禮記王制

注云州猶聚也此韋氏所本

審其四時解言四時各有其宜也謂死生疑釋之時也

疑當作凝

考工記草木有時以生有時以死水有時以凝有時以澤

李軌

音釋鄭注云言百工之事當審其時也

辨其功苦解功牢也苦脆也

管子尹注功謂堅美苦謂濫惡荀子王制篇辨功苦楊注功

謂器之精好者苦謂濫惡者又勸學篇注引韋此注作堅曰

功脆曰苦與今本不同恐以意改之也案周官鹽人共其苦

鹽杜子春讀苦爲鹽典婦功辨其苦良先鄭司農讀苦爲鹽

詩鵠羽傳鹽不攷致也四牡傳鹽不堅固也漢書食貨志器

苦惡如淳注云苦或作鹽鹽正字苦假借字

權節其用解權平也視其平沈之均也

考工記輪人平沈必均鄭司農云平沈謂浮之水上無輕重

論比協材解論擇也

未說文掄擇也論與掄同

察其四時解田時所用者預資之也

越語賈人夏則資皮冬則資絺旱則資舟水則資車以待乏

也

服牛輶馬解服牛車也

依公序本

輶馬車也詩云睨彼牽牛不以服

箱

考工記車人大車崇三柯綆寸牝服三柯有參分柯之二鄭

司農注云牝服謂車箱服讀爲負詩大東篇毛傳云服牝服

此牝卽牛大車重載牛負之故謂之牝服韋解引詩以證服

牛之義服牛車爲大車也

漢平帝紀立輶併馬服虔以立輶爲立乘小車如瀋注漢書
高祖紀云律四馬高足爲置傳四馬中足爲馳傳四馬下足
爲乘傳一馬二馬爲輶傳輶馬車爲小車也管子海王篇行
服運輶輶者必有一斤一鋸一椎一鑿若其事立
權節其用解權平也平節其器用小大倨句之宜也

考工記車人爲耒庇堅地欲直庇柔地欲句庇直庇則利推
句庇則利發倨句磬折謂之中地此所謂倨句之宜也

耒耜解耜拂也所以擊草也芟大鎌所以芟草也

耒當依舊音作枷方言僉自關而西或謂之拂郭璞注云今
連枷所以打穀者說文拂擊禾連枷也枷拂也淮南謂之桷

釋名枷加也加杖於柄頭以撾穗而出其穀也漢書王莽傳
予之北巡必躬載拂顏師古注拂所以擊治禾者也今謂之
連枷案拂與拂同注擊草疑當作擊禾涉下芟草而誤

擊菓除田

夏小正正月農率均田某氏傳云均田者始除田也言農夫
急除田也詩載芟毛傳云除草曰芟除木曰柞

挾其槍刈耨耨解刈鎌也

方言刈鉤自關而西或謂之鎌此韋注所本也管子輕重已
篇又樞權渠緹縹所以御春夏之事也又卽刈也今本管子
譌作又

詩臣工奄觀銍艾艾與刈通

首戴茅蒲身衣襪襪解茅蒲簦笠也襪襪褰裳衣也茅或作萌

萌竹萌之皮所以爲笠也

茅蒲茅或作萌萌爲竹萌也土喪禮下篇燕器仗笠斐注笠竹簦蓋也疏謂以竹青皮爲之此韋注所本也管子小匡篇作苧蒲

管子注襪襪謂麤堅之衣眾經音義十五引通俗文三尺衣謂之襪襪當依舊音作薛六韜農器篇蓑薛笠說文蓑雨衣一曰蓑衣蓑艸雨衣秦謂之蓑蓑薛同聲通用蓑後人加艸

野處而不暱解暱近也

暱當讀爲慝管子小匡篇作樸野而不慝尹知章注云農人之子朴質而野不爲姦慝韋注失之

有司已於事而竣解竣退伏也

爾雅釋言竣退也廣雅釋詁竣伏也竣同郭注爾雅引外傳已復於事而竣說文作有司已事而竣

參國起案以爲三官解參三也案界也分國事以爲三也

爾雅釋詁按止也案與按通韋訓界義未聞

擇其善者而業用之解業猶創也

廣雅釋詁業創始也故業轉訓爲創王氏引之曰爾雅業敘也言擇舊法之善者而次敘用之也韋注失之爾雅述聞

十連爲鄉鄉有良人焉以爲軍令解賈侍中云良人鄉士也明道

作卿士非昭謂良人鄉大夫也

司馬法天子之義篇周曰元戎先良也爾雅良首也廣雅良

長也竝與此良人之良義同齊策蘇秦說齊宣王曰齊車之
良五家之兵齊至戰國時猶用管子之制

十軌爲里故五十人爲小戎里有司帥之解小戎兵車也此有
司之所乘故曰小戎詩云小戎伐收古者戎車一乘步卒七十
二人今齊五十人

金氏鶚曰司馬法有一乘三十人之說此爲調發之制與左
傳帥車三百乘甲士三千人孟子革車三百兩虎賁三千人
管子一乘四馬白徒三十人奉車兩皆無不合周官言五伍
爲兩兩者車一乘也調發一乘三十人而戰止用二十五人
蓋以步卒五人將重車也管仲變易周制五十人爲小戎是
二十五人之倍則卽變法之中亦可以知古法也諸家悉依

司馬法丘甸之制一乘七十五人作解誤矣

求古錄

人與人相疇家與家相疇解疇匹也

爾雅釋詁讎匹也郭注讎猶儔也疇與儔古字通楚辭疾世篇居嶢廓兮眇疇王注云疇匹也

鄉長復事解鄉長鄉大夫也復白也

周禮宰夫諸臣之復鄭注復之言報也反也反報於王謂於朝廷奏事

慈孝於父母

禮記內則昧爽而朝慈以甘旨孟子離婁篇雖孝子慈孫猶祭統言孝子孝孫也慈亦孝也管子山權數篇君不高慈孝則民簡其親而輕過莊子漁父篇事親則慈孝事君則忠貞

皆慈孝連文

有拳勇股肱之力解大勇爲拳詩云無拳無勇

詩小雅毛傳云勞力也說文手部捲氣勢也从手卷聲引國

語有捲勇捲正字拳假借字李登聲類云拳或作捲見文選

卿書字亦作權詩盧令箋鬢讀當爲權權勇壯也

有不慈孝於父母不長弟於鄉里

慈孝亦作孝慈長弟亦作弟長墨子非命篇云入則孝慈於

親戚出則弟長於鄉里

使民以勸綏誨言解綏止也

爾雅釋詁安止也安與綏古字通禮記曲禮下大夫則綏之

國君綏視鄭注竝讀爲安儀禮士相見禮注古文安爲綏漢

書燕刺王傳北州以妥孟康注云古綏字也

罷士無伍罷女無家解罷病也無作曰病

作當依公序作行

無伍無與

爲伍也周禮大司寇以圜土聚教罷民夫稱家也

管子尹注罷謂乏於德義者尹與韋注同也荀子成相篇賢而能容罷知而能容愚罷與賢對文罷卽不賢也義竝同

鄭司農司圜注引國語云罷士無伍罷女無家言爲惡無所容入也案鄭仲師國語章句宋庠補音云亡其篇數今國語所錄司農說是皆鄭康成語而仲師注絕不一及此仲師周禮注用釋國語之義而韋注援引周禮或卽本鄭仲師國語章句舊文也

犧牲不略解略奪也